

Da mesanotg tras il Veraina

Nov urari dal traffic public

DA GION NUTEGN STGIER / ANR

■ A partir dals 15 da december vegnan a cursar da glindesdi fin venderdi dapli trens tranter Cuira e Glion. Durant l'enviern èsi pussaivel da chargiar l'auto tras il tunnel dal Veraina fin las 23.50. Il viadi cun il tren da Cuira a Son Gagl sa reducescha per 11 minutas. Ier è vegnì preschentà a Cuira il nov urari dal traffic public en il Grischun. En vigur va quel ils 15 da december e tenor quel pon ins quintar cun dapli colliaziuns e pli curts viadis. Preschentadas èn las midadas vegnidas da cusseglier guvernativ Mario Cavigelli, da Hans Amacker, directur da la Viafier retica e da Manfred Kürschner, manader AutoDaPosta regiun Grischun. Il minister da traffic da noss chantun, Mario Cavigelli, ha ditg che cun far intginas midadas en il nov urari da traffic vegnia contribuì bler per l'attractivitat dal Grischun sco lieu da turissem, d'economia e d'abitar. Cun la midada da l'urari da traffic sa reducescha per exempel il viadi cun il tren da Cuira a Son Gagl per 11 minutas. Il viadi cun il tren da Son Gagl en l'Engiadina ubain en Surselva vegn schizunt ad esser per 22 minutas pli curt grazia a las novas colliaziuns.

In mez onn pli baud

Da nov vegn er introducì in tren regional tranter Cuira e Sargans che cursescha mintga 30 minutas. Ina ulteriura midada che la Viafier retica fa cun l'entschatta da la stagiun d'enviern è che a partir dals 15 da december pon ins chargiar l'auto tras il tunnel dal Veraina in'ura pli tard. L'ultima partenza a Selfranga è da nov a las 23.50 e da l'Engiadina en direcziun Partenz a las 00.20. Il directur da la Viafier retica, Hans Amacker, ha ditg ch'il project «Retica 30» vegnia ad ir en vigur gia



Da nov vegnan a cursar mintga 30 minutas autos da posta da Cuira en direcziun Lai.

FOTO G. N. STGIER

ils 15 zercladur 2014 enstagl sco prevì il december 2014. Sche quel project va en vigur èsi previs mintga 30 minutas in tren da Turitg en la chapitala da noss chantun e da là davent colliaziuns directas en las regiuns grischunas. La pli gronda midada tar AutoDaPosta regiun Grischun è che a partir dals 15 da december cursescha tranter Cuira e Lai mintga mes'ura in auto da posta. En la carta dal di da 69 francs per ir cun skis en il nov territori collià Arosa-Lai è er cumpiglià il bigliet per ir cun l'auto da posta da Cuira a Lai, ubain per ir cun il tren da Cuira ad Arosa.

Mustér–San Murezzan

Ina midada essenziala cumpiglia il nov urari er quai che pertutga ils trens per pendularis sursilvans. Tranter Cuira e Glion vegnan a cursar ulteriurs trens la damaun sco er la saira. Quels ulteriurs trens curseschan dentant be dal glindesdi fin il venderdi. Davent da Glion parta da nov en direcziun Cuira in tren supplementar a las 07.53. Da Cuira en direcziun Glion vegnan da nov a cursar supplementar dus trens dasper l'existent da las 17.25. Quel vegn da nov ad ir a partir dals 15 da december be fin a Glion, enstagl fin a Trun. Ils dus trens supplementar

tars partan en la chapitala grischuna en direcziun Glion a las 16.25 ed a las 18.25. Ils trens existents da Cuira en direcziun Glion, Trun e Mustér curseschan sco fin ussa, be ils trens supplementars van fin Glion. Da Glion a Cuira partan da nov trens a las 17.03, 18.03 ed a las 19.03. En vista al giubileum 125 onns Viafier retica cursescha da nov il «Glacier Express» per quatter mais (zercladur–settember) da Mustér fin San Murezzan ed enavos. Da stagiun augmenta dentant er AutoDaPosta regiun Grischun sia purchida da Cuira a Laax sin in tact da mintgamai 30 minutas.